



Održana ekspertska debata o rezultatima istraživanja javnosti o medijskim slobodama

08 05. 2013



Ekspertska debata o rezultatima istraživanja javnog mnjenja o medijskim slobodama u BiH kojeg je uradila Fondacija Friedrich Ebert, održana je danas u sarajevskom Media centru u organizaciji BH novinara. Istraživanje javnog mnjenja koje je provedeno na uzorku od 503 ispitanika pokazalo je da građani BiH najviše vjeruju medijima, pa vjerskim zajednicama i nevladinom sektoru. Političarima i političkim strankama građani najmanje vjeruju.

Međutim, istraživanje je pokazalo da u većini slučajeva građani smatraju da mediji dižu tenzije u društvu, da su politički kontrolisani i da ne zadovoljavaju informativne potrebe građana, kako privatni mediji tako i javni servisi. Profesorica Fakulteta političkih nauka u Sarajevo Lejla Turčilo kazala je da je bitno da javnost sve više prepoznaje razliku između novinara i medija.

“Građani uviđaju da pritisci na novinare dolaze iz samih medija i bolje shataju odnose na medijskoj sceni. Međutim, problem je što izostaje podrška javnosti novinarima, što je pokazalo ovo istraživanje. S druge strane, govorimo da u medijima rade samo pošteni, moralni i profesionalni ljudi kojima samo politika smeta da budu perfektni. Moramo biti iskreni prema sebi”, kazala je Turčilo.

Istraživanje je pokazalo da građani od medija žele više socijalnih, ekonomskih i tema iz svakodnevnog života. Zbog političkih pritisaka i nedostatka finansijske podrške tih tema nedostaje i javnim televizijama. Zvonimir Jukić, direktor programa FTV-a, kazao je da zakonska regulativa omogućava političarima da utiču na uređivačku politiku javnih servisa.

“Odupiremo se političkim pritiscima godinu dana ali ne znamo kako će se sve završiti. Treba pojačati uticaj RAK-a na odabir članova Upravnog odbora. Potrebno je mijenjati zakonske propise kako bi se mediji zaštitili od političara. Producija svih javnih servisa je loša jer ne postoji finansijska podrška institucija i nismo u mogućnosti stvarati bolji program”, kazao je Jukić.

Političare i političke stranke ispitanici smatraju glavnim kršiteljima novinarskih prava i medijskih sloboda. Međutim to se događa u puno većoj mjeri u Federaciji nego u RS-u. Građani BiH smatraju kako poslovni ljudi krše prava novinara u RS-u puno više nego u Federaciji. Adis Arapović iz Centra civilnih inicijativa je kazao da je cilj politika u BiH da se stavi pod kontrolu sve što je moguće, od javnih preduzeća do medija.

“To se ne zadržava na medijima nego su na udaru i nevladine organizacije i drugi koji drugačije misle. Treba se zajedno oduprijeti tom pokušaju apsolutne kontrole”, kazao je Arapović.

